



Sabtu, 27 Nopember 2021

Ogen: Esra 10:1-4



La Ngergai Diberu



Tradisi patriakal mekelek kal mereken ngaruh ku bas kegeluhen kalak Jahudi. Diberu e la tempa niakap seri ergana ras dilaki. I bas erbahan keputusan pe tetap iendesken man si dilaki. Janah si dilaki labo tempa iukurina perasan ras penggejapen sekalak diberu. Si mekelekna, diberu ras diberu pe la si ergan, status sosial erbahansa lit perbahanen si la seri nandangi sekalak diberu.

Teridah arah pengogenta maka bangsa Israel enggo ngelakoken pelanggaran nandangi kai si iperintahken Tuhan. Lit aturen maka kalak Jahudi la banci ngempoi diberu-diberu si labo kalak Jahudi (la banci kawin campur). Kinatana enterem dilaki kalak Jahudi erjabu ras diberu-diberu suku si deban si erbahansa erdosa ia man Tuhan. Tupung Nabi Esra ertoto ngakuken dosa-dosa bangsana, tangis kerina dilaki ras diberu atan pe anak-anak, igejapkenna perbahanenna si enggo nulak perintah Tuhan. I bas pengakun e turah tekad i bas ia maka isirangkenna kerina diberu-diberu si enggo iempoina si labo suku Jahudi. Diberu-diberu kalak Jahudi pe ikut ngayukensa. Teridah maka diberu e la meherga i bas mata dilaki kalak Jahudi. Banci ibahanna bagi sura-surana saja. Sekali enda iempoina, pagi iulihkenna. Tempa ibahanna diberu e bagi barang daya-dayan.

Labo dilaki kalak Jahudi ngenca si bage. Enterem nge dilaki kalak Karo erjabu dua, apai pe ipakena, lit sada sah ndeharana, sada nari buni-buni. Tupung lit perubaten ipemulihna diberu e, mulihkan ia ndehara si sah ndai. Uga pe lit nge mesui pusuh adi iduaken, janah mesui ka nge pusuh ikataken ndehara la sah, banci ate-ate, banci ka mis ipemulih. Selaku diberu, si erganlah kita. Kita arus pang erjuang ndatken keadilan.